

# 31 milliuns gudogn tar cundiziuns difficilas

Resutats da l'onn 2012 da l'interpresa Repower

■ (anr/fa) Causa la conjuntura flaivla ed ils pretschs bass per l'energia èn gudogn e resultat operativ da la Repower pli bass che l'onn avant. Perquai reponderescha l'interpresa las investiziuns e reducescha plazzas da lavor.

«Nus nun essan cuntents cun l'onn da gestiun passà», ha ditg Kurt Bobst, il CEO da la Repower mesemna a Cuira cun preschentar als meds da massa la bilantscha 2012. L'onn passà ha cuntinuà il gudogn dal concern grischun numnadamain a sa diminuir: Dal 2012 ha la Repower fatg in gudogn da 31 milliuns francs. L'onn avant aveva fatg l'interpresa in gudogn 54 milliuns francs. «Il gudogn operativ s'ha diminui per 38 pertschient sin 81 milliuns francs», ha infurmà il schef da finanzas Stefan Kessler. Era la prestaziun totala da la Gruppa Repower s'ha durant l'onn da rapport reducida per 6 pertschient sin stgars 2,4 milliardas francs. Il cussegl d'administraziun fa la dumonda a la radunanza generala da pajar ina dividenda per aczia da 2.50 francs, quai signifitga mo la mesadad da l'onn precedent. Da l'onn 2010 impurtava la dividenda anc 8 francs.

## «Energia idraulica perda valor»

Kurt Bobst ha motivà il resultat na uschè bun cun ils midaments fundamentals sin il martgà da l'energia en Svizra ed a l'ester. Plirs facturs influenzeschan sco ch'el ha ditg quests martgads: «Per pudair cuntanscher la finamira da nun esser pli dependents d'energia nucleara vegnan construids per part cun sustegn statal pli e pli implants d'energia regenerabla», ha'l declerà. La consequenza è ch'igl exista ina surpurchida d'energia, «ils pretschs per electricitad sa sbassan anc dapli.» Causa la crisa economica che sa fa valair dapi l'onn 2008 ed era pervi dal franc ferm en cumparegliaziun cun l'euro vegni sco ch'el ha ditg era consumà damain energia:



La Repower spera quest onn da survegnir da la regenza la concessiun per l'ovra d'accumulaziun Lago Bianco. FOTO R. CANAL

«Quests midaments dal martgà d'energia diminueschan fermamain era la valor da l'energia idraulica.» Engrevgià è vegnì il resultat 2012 da la Repower era dad uschenumadas influenzas extraordinaras: L'interpresa ha stuì far rectificaziuns da valor per l'import da 10 milliuns francs per ovras idraulicas pitschnas e 20 milliuns francs per pretensiuns tar l'affar dal concern en Italia.

## «La situaziun difficila cuntinua»

Bobst e Kessler supponan che la situaziun sin il martgà d'energia na vegnia betg a sa meglierar a curta ed a media vista. Perquai ha la Repower reagì e decis sco annunzià al cumenzament da l'onn

pliras mesiras: «Cun augmentar l'effizienz prevesain nus da spargnar 10 milliuns francs tar ils custs annuals», ha ditg Stefan Kessler. Ina consequenza da quest program da spargn è era l'intent da reducir plazzas da lavor: «Ins sto displaschavlamain abolir 25 fin 30 plazzas da lavor. Ultra da quai vegn la Repower er a reducir las investiziuns.

## Tschertgar partenaris tar ils differents projects

Ils proxims 10 fin 15 onns aveva la Repower l'intenziun dad investir 2 fin 2,5 milliardas francs en differents projects. «Nus vegnin a prender en egl mintga project ed examinar nua che nus pudes-

san reducir nossas participaziuns», ha ditg Kurt Bobst. La finamira è da reducir las investiziuns per 35 fin 40 pertschient. El ha menziunà ch'il project dal Lago Bianco saja sin buna via, ins spetgia quest onn da survegnir da la regenza la concessiun per realisar quest'ovra d'accumulaziun a pumpa. «Nus essan en discussiuns intensivias cun plirs partenaris potenzials, l'interess da sa participar a quest project cun in volumen d'investiziun da var 2,5 milliardas francs è malgrà las cundiziuns da basa difficilas avant maun.» Tar l'ovra en Italia Saline Joniche emprovan ins tenor Bobst da diminuir la participaziun da la Repower sin 20 pertschient.